

Carta a los Hebreos **Kjibokwo ère tak hebreoga kong** **Kjibokwo ère sorè**

Kjibokwo ère tak beno pjang hebreoga mār Jesús go li kong. Hebreoga li, e kowëba Israel tjëyoga, e kowëba judíoga bakoe. Epga tjëyo kjrinaso, gueniyo kowëba oblë oblë eni.

Kjibokwo ère taga èrë miydëy llëme. Kjone kjone tjlë ga taga Pablorë le. Kjone kjone tjlë ga taga Bernabéré le. Kjone kjone obi tjlë ga taga Apolosdë le. Gueniyo taga èrë miydëy yõtso llëme.

Eshko dbaryo ga hebreoga mār lōng Jesús go li shdungoba ara. E kjĩshko ga kjone kjone Jesús rayë woydë, mār ber lōng kjok llgwekklo tara Moisésdë li go irōng obi wlo. No kjone kjone to lōng tjlë ga ëye dōya Jesúsde ga ä, ga woyde ga raye le. E kjĩshko ga kjibokwo ère taraba, epga dbokjrë e go wlo.

Dënashko ga Sbö tjlëno nopga kong ba tjlökwo lagaga go, ba parkagaga kjok dogo so go bako, gueniyo eshko dbaryo ga tjlëno ba Wa Jesús go li taraba ba kong. Dënashko ga Sbö tjlë ba nopga kong ga llono ga tjlökwo twe ba kong tjaqlën, ber pjlú, tjlökwo bäm go li kjinmo le, ga shäryara eni Jesús go li taraba ba kong. Owa pjang bi go li löya Sbörë kjok llgwekklo tara Moisésdë li kjĩshko llëm, gueniyo Jesús wolono pjaraso, owa pjang bi go kës li löya Sbörë ber dret wlo, ga shji ie ber lōng pjlo bek ba bokso e kjĩshko ga pjlú li taraba ba kong. Llëbo shäryara Jesúsde bi kong li kjĩshko ga shji äär Sbö bokshto kjok dogo ba pjlú wlo li taraba ba

kong. Eni ga epga icharaba mär Jesús go jlökoyo, llëbo wen ba kong owa gueniyo.

Sbö Wa, e tjwlō ara, Sbō parkagaga kjok dogo so kjinmo

¹ Dēnashko ga Sbō tjlēno ba tjlōkwo lagaga oblē oblē kong, le lok bi tjlapgaga kong wlo. Tjlēno eni kop ara, ga tjlēno oblē oblē bakoe.

² Gueniyo ga dbar pjir lē dbaryo eerishko ga ba Wa ichara tjlēno bi kong om go shara. Ba Wa li go ga kjok shāryara Sbörē uunkong, ga llono ga llëbo tjeng kēs li ber bañya.

³ Ba dbo kãã, e so Sbō i kjoyo, e so e kjoyo kjishko. Llëbo kēs tjeng ba wloshko, ga iche ba tjlōkwo dbo ara li go, srer llēm wlo. E wolono, llëbo owa shāryara nopgarē li potjwlēkklo. E irgo ga öötong beno sök Sbō orkwo kēlëkong kjok dogo.

⁴ Eni ga öötong sök tjwlō ara, Sbō parkagaga kjok dogo so kjinmo, ga ba ko tjwlō ara ba kjinmo bakoe.

⁵ Miydëy eni, llëbo lara Sbörē ba kong li kjishko. Tjlēno ga

«Pja bor Wa;

eeri ga tja öötong beno sök bop Data.»*

Lara eni ba Wa kong, gueniyo lara ba parkagaga kjok dogo so kong eni llëme. Ga tjlēno obi ga

«Tja ber sök ba Data;

era ber sök bor Wa.»†

⁶ Ga ba Wa li ichara kjok ère kjing goshko ga tjlē ga «Bor parkagaga kjok dogo so,

* 1:5 Salmo 2.7. † 1:5 2 Samuel 7.14; 1 Crónicas 17.13.

bor Wa, e poshrëzi uunkong.»‡

7 Ga tjlëno ba parkagaga kjok dogo so kjïshko.

Tjlëno ga

«Ba parkagaga kjok dogo so,
e shäryara beno so pjluk kjoyo,
so iök kjoyo bakoe.»§

8 Gueniyo tjlëno ba Wa kong ga

«Pja Sbö,
pja ber sök no pjluyo ïyado wlo,
ga kjok llgwep beke.

9 Llëbo pjlú shäryëbashko ga pja wopjlú eshko.

Gueniyo llëbo owa shäryëbashko ga pja woydë
ara eshko.

E kjïshko ga pja ioror beno sök wopjlú,
bop pjeyoga löng kës li kjinmo.

Tja bop Sbö jlökoyo.»*

10 Ga tjlëno ba kong obi ga

«Tjlapga, kjok ëre dämärshko ga
kjok uunkong shäryaga pjarë,
kjopkwo, klung bakoe.

11-12 Llëbo kës ëre pjir,

gueniyo pjara ber sök ïyado.

Shwong këguëshko ga dbuy,
llëno ame kjïshko.

Pja opshäryë llëbo kës ëre tjok eni wleni.

Gueniyo pjara kjlopswë llëm,
pja ber sök ïyado.»†

13 Ga tjlëno ba kong obi ga

«Pja tek wlar ber sök bor orkwo këëkong,
äär jong bop moskwoga zanor pjir guing,

‡ 1:6 Deuteronomio 32.43. § 1:7 Salmo 104.4. * 1:9 Salmo 45.6-7. † 1:11-12 Salmo 102.25-27.

eshko ga iër ber tjeng bop wloshko.»‡
Lara eni ba Wa kong, gueniyo lara ba parkagaga
kjak dogo so kong eni llëme.

¹⁴Epga sëyaga to löng parkë Sbö kong eröe. Ga epga
iche nopga dâr wlo li kjimtë.

2

Sbö tjlökwo woyotjlïy yõtso

¹Woyde ga Sbö tjlökwo kuroy li woyotjlïy yõtso,
shji opkwë sira sira ey dwayo llëm wlo.

²Dënashko ga Sbö tjlökwo söra ba parkagaga kjok
dogo sorë bi tjlapgaga kong, ga llëye lara ba kong
li, e kolako. Eye omkolono llëm ga shduna Sbörë
beke.

³Shji dâr sorë tjlökwoyo lira, e kësbang, wolësoe.
¿Eni ga e kjrëy llëm ga shji shdüya eni llëm sorëro?
Tjlökwo ëre laga Tjlapga Jesúsdë bäm go. E irgo
ga ba tjlökwo kugaga omloño bi kong eni bakoe.
Miydëy e go ga e beke.

⁴Ga llëbo ÿydëba llëm wleniyo shäryara Sbörë bi
kong oblë oblë, ga ba Sëya ichara kjok miydë twë
bi kong, woydara Sbörë sorë li eni. Shäryara eni,
miydëy e go wlo ga tjlökwo li beke.

Jesús opyono beno so ba pjeyoga kjoyoe

⁵Llono ga dbar tjwe kjwara oblë li lörwarë bomi
kong. Eshko ga ba parkagaga kjok dogo so ie Sbörë
kjak llgwek llëme.

⁶Llëbo tak pjang Sbö tjlökwo go, dbar lërwa löng
li kjïshko. Tjlë ga

«No* tjwlõ ara llëme.

‡ 1:13 Salmo 110.1. * 2:6 No le li, e Jesús loklo.

¿Eni ga woyotjlíp ara ega?

¿Tjwlõ ara lëp ega?

⁷ Bäm go ga iorop beno tjwlõ
bop parkagaga kjok dogo so dorko.

E irgo ga iorop beno kësbang, tjwlõ ara,

⁸ iorop beno shäng llëbo tjeng kës li ichaga
bakoe.»†

Miydëy e go ga llono ga llëbo tjeng kës li iche no
lirë. Gueniyo eerishko ga llëbo iche llëm wleniyo
tjok obi.

⁹ Llëye weno Jesús tjok li miydëy pjlúe. Bäm go ga
iara Sbörë beno tjwlõ ba parkagaga kjok dogo so
dorko. Ga Sbö wopjlú li kjishko ga ichara wolon
bi kjishko. Ga wolono kjishko ga iara beno kësbang,
tjwlõ ara.

¹⁰ Ba go ga llëbo tjeng kës li shäryara Sbörë, ga
beno tjeng ba kong uunkong. Llëbo owa ichara
wen ba kong ara. E poshäryara ber nopga ara döga
wlo eni. Sbö omshäryono eni, woydara eni kjishko,
ga shäryara beke.

¹¹ Jesús, nopga iara beno tjeng dboy Sbö kong li,
e Data kjaraso. E kjishko ga epga lökyokjre Jesúsde
llëm, kowe ba pjeyoga.

¹² Tjlëno Sbö kong ga

«Bop royler bor pjeyoga kong.

Pja poshrër ara, epga tön löng lishko.»‡

¹³ Ga tjlëno obi ga

«Tja mär Sbö go.»§

Ga tjlëno obi ga

† 2:8 Salmo 8.4-6. ‡ 2:12 Salmo 22.22. § 2:13 Isaías 8.17.

«Tja shäng bor wapga twara Sbörë bor kong li tjok.»*

¹⁴ Iara beno ba wapga li, e nopga, ga nopga ichaga wolon li, e Ä, ga uunkong tjeng Ä wloshko e kjishko. E kjishko ga Jesús öötong beno shäng no, ga wolonoe. Shäryara eni, Ä zäya wlo,

¹⁵ nopga döya Ä wloshko dwayo wlo bako, ber löng ba wolon li bangkjre ame wlo.

¹⁶ Jlökooyo ga e shrono shäng Sbö parkagaga kjok dogo so li kjimtaga wlo llëm, shrono shäng Abraham tjeyoga kjimtaga.

¹⁷ E kjishko ga iara Sbörë beno shäng ba pjeyoga dik, llëbo wen ba kong lok kës li wen ba kong eni wlo, epga sorë miyde pjir wlo. Eni ga songe le ga pjlú, ga parkë syöshtaga kësbangyo wleni ba kjishko ga pjlú bako, e äär ber llëbo owa shäryara li potjwlëkklo wlo.

¹⁸ Ga öör shäng song, tjlına Äre ara, llëbo owa shäryë wlo lara kuzong ga nopga tjlıya Äre enishko ga epga kjimte ga pjlúe.

3

Jesús tjwlö ara, Moisés kjinmo

¹ E kjishko ga pjeyoga, pjäy rokara Sbörë, iara beno tjeng dboy ba kong li, Jesús woyotjlizı İyado. Ichara Sbörë ba tjlökwö roy lé bi kong li e. Syöshtaga Sbö kong bi kjishko kësbangyo li e bakoe. Shji mär ba go lëy eni.

* **2:13** Isaías 8.18.

² Jesús iara Sbörë beno shäng parkë ba kong, ga parkono pjlú, Moisés parkono pjlú Sbö nopga kong sorë ga eni.

³ Gueniyo Jesús, e tjwlõ ara, Moisés kjinmo, domer u shäryaga tjwlõ ara, u shäryara li kjinmo wleni.

⁴ U tjeng kës li shäryaga tjok, gueniyo llëbo tjeng kës li shäryaga Sbörë.

⁵ Moisés parkono Sbö nopga kong pjlú, parkaga tjwlëk shäng pjir wleniyo dik. Eni ga llëye shäryara li beno llëbo wen llono li jyäglö.

⁶ Gueniyo Cristo, e Sbö Wa, ga parkë shäng Sbö nopga ichaga. Tjawa tjlä ga shji mär ba go, ga koshëy iyado lëy eni. Shäryëy eni jlökoyo wleni ga shji ber ba nopga, so u shäryara li kjoyoe.

Woyde ga shji mär Sbö go äär jong ba dbo go

⁷⁻⁸ E kjishko ga Sbö Sëya tjlä ga
«Eeri ga Sbö tjlökwö kumi wleni
ga kjrozïa.

Bomi tjlapgaga tek dënnashko so,
Sbö kolara lok llëm,
llëye kuya woydë llëm bakoe.

Pjäy opshäryë baïya dik llëme.

Epga löng kjok dogro no llëmshkoshko ga
Sbö tjläna lok.

⁹ Llëbo shäryara Sbörë kës li ïna lok öötong lu pjloglö
sak pkëng (40).

Eni ëmdë ga Sbö tjläna lok ara.

¹⁰ E kjishko ga Sbö iirkono ara ba kong,
ga tjlä ga “Jeno löng iyado, jëk lok woydë bor
tjok llëme” le.

¹¹ E kjishko ga Sbö iirkono ara ba kong,

ga tjlë jlõkoyo ga “Epga äär löng bor wosh-tozlong kjokyo llëme”» le.*

¹² ¿Pjeyoga, pjây sjêke! Sbö, e sök ïyado. Eni ga llëbo owa iëmi äär ber tjeng bomi pjłúshko llëm, Sbö rayëmi llëm wlo.

¹³ Dbar kjwobi go ga pjây ëng kjimtos dbokjrë dey. Dbar kowëy «eeri» li pjang obishko ga pjây opshäryos eni, pjây jyãpgwe llëbo owa lirë llëm wlo, Sbö rayëmi llëm wlo.

¹⁴ Shji mär löng Cristo go bäm go sorë ga woyde ga shji mär ber löng ba go eni äär jong ba dbo go. Shäryoroy eni ga shji äär ber löng ba tjok ïyado,

¹⁵ tak pjang Sbö tjlõkwo go sorë li eni. Tjlëno beno eni:

«Eeri ga Sbö tjlõkwo kumi wleni ga
kjrozïa.

Bomi tjlapgaga tek dënnashko so,
Sbö kolara lok llëm,
llëye kuya woydë llëm bakoe.

Pjây opshäryë baïya dik llëme.»†

¹⁶ ¿Nopga öör löng Sbö tjlõkwo kuno, gueniyo kolara lok llëm li ë? Nopga shira Moisésdë tek Egipto kjokyo dwayo li epga om go.

¹⁷ ¿Sbö iirkono öötong lu pjloglo sak pkëng (40) li ë kong? Nopga llëbo owa shäryono, ga wolono tjeng kjok dogro no llëmshko li kong.

¹⁸ «¿Epga äär löng bor wosh-tozlong kjokyo llëme» lara Sbörë jlõkoyoshko ga ë layde shäng? Nopga ba tjlõkwo kolono llëm li layde.

¹⁹ Miydëy e go ga epga öötong lok llëm, epga mär Sbö go llëm kjishko.

* **3:11** Salmo 95.7-11. † **3:15** Salmo 95.7-8.

4

Sbö nopga äär ber löng ba woshtozlong kjokyo

¹ Tjłkwo lara Sbörë ba kong lok jlőkoyo li beno bi kong bakoe. Shjira ie woydë äär ber löng ba woshtozlong kjokyo bakoe. E kjışko ga shji sjëk, shji äär ber löng eshko wlo.

² Sbö tjłkwo pjlú li kuroy wëlle, epga omkuno dik, gueniyo mär Sbö go llëm kuzong ga beno ba kong ga llëno llëme.

³⁻⁵ Shji äär ba woshtozlong kjokyo wlo ga woyde ga shji mär ba go, lara Sbörë sorë li eni. Tjlëno beno eni:

«E kjışko ga Sbö iirkono ara ba kong, ga tjłë jlőkoyo ga “Epga äär löng bor woshtozlong kjokyo llëme” le.»*

Gueniyo llëbo tak pjang Sbö tjłkwo go. Tjłë ga «Dbar kjäk (7) ga ba pak shäryara pjirshko ga woshtonoe.»† E irgo ga tjłë ga «Epga äär löng bor woshtozlong kjokyo llëme» le. Miydëy e go ga kjok shäryara Sbörë pjirshko ga woshtozlong kjokyo lara li, e shäryak pjir tjän.

⁶ Miydëy e go ga no kjone kjone äär ba woshtozlong kjokyo ga pjlúe. Gueniyo nopga Sbö tjłkwo pjlú li kuno bäm go li öötong eshko llëm, kolara lok llëm kjışko.

⁷ E kjışko ga lu kop ara irgo ga Sbö tjłëno David kong. Eshko ga dbar iara beno kjwara obi, ga kowara «eri». Eshko ga tjłkwo lara jlőkoyo loror bomi kong tjän li, e lara nopga löng eshko li kong jek obi. Tjłë ga «Eri ga Sbö tjłkwo kumi wleni ga

* 4:3-5 Salmo 95.11. † 4:3-5 Génesis 2.2.

kjrozĩa.

Pjãý opyë ber löng llëye kumi woydë llëm wleni llëme»‡ le.

⁸ Epga iara Josuére beno löng woshtë jlökoyo kjwe ga dbar iara Sböre kjwara obi llëme.

⁹ Miydëy e go ga llono ga ba nopga kong dbar twe Sböre kjwara obi, woshtë jlökoyo wlo, Sbö woshtono dbar kjäk (7) lishko sorë ga eni.

¹⁰ Eshko dbaryo ga ëye öötong löng eshko ga parkë ame, ber löng woshtë jlökoyo, Sbö woshtono sorë ga eni.

¹¹ E kjĩshko ga shji drön ëë, shji äär eshko wlo. Llëm ga shji kjone kjone Sbö kolë llëm, Israel tjëyoga dik, ga shji äär eshko llëme.

¹² Sbö tjlökwo, e së, dbo ara bakoe. Shji oblë shorkek dröng kowo stek kar kar wleni go ga dröng li opzrëk rongë. Sbö tjlökwo li, e so dröng e kjoyoe. Opzrëk rong, kjlay bi pjlúshko. E go ga shji wotjlik pjlúre, de owa, e miydëy wëlle.

¹³ Llëbo jney, ĩga Sböre llëm wlo ga äe. Llëbo uunkong ĩya wëlle, ga llono ga shji iche ba dboryë, llëbo shãryoroy kës li kjĩshko.

Jesús, e syöshtaga Sbö kong bi kjĩshko kësbangyo

¹⁴ Jesús, e Sbö Wa. E öötong sök kjok dogo. Syöshtaga Sbö kong bi kjĩshko kësbangyo li e. E kjĩshko ga shji mär ba go lëy kuzong ga woyde ga shji mär ber löng ba go jlökoyo.

¹⁵ E tjlĩna Äre ara, llëbo owa shãryë wlo ĩara, shji tjlĩya Äre sorë ga eni. Gueniyo era llëbo owa shãryono llëme. E kjĩshko ga shji sorë li miyde shäng

‡ 4:7 Salmo 95.7-8.

pjlú, ga shji dbo ara llëmshko, shji songshko ga shji songe le ga pjlúe.

¹⁶ E kjishko ga shji jek äär Sbö bokshto lan ba tjok wlo, llëye bangkjrëy llëm wleni, shji woyde ara kjishko. Eni ga shji songshko ga shji songe le, ga shji kjimte ba wopjlú li kjishko.

5

¹ Syöshtagaga Sbö kong Israel tjëyoga kjishko kësksëyo kjrara Sbörë kjlobi nopga li tjrëko dwayo, parkë Sbö tjok, nopga li kong wlo, öng zröya, sho suya, llëbo owa shäryara nopgarë li kjishko wlo bakoe.

² Nopga li kjok miydë ara llëm, ga olö ga llëbo shärye lok owa, dbo ara llëm kjishko. Eshko ga songe le syöshtagaga lirë ga pjlú, epga dbo ara llëm eni bako kjishko.

³ E kjishko ga öng zröya, sho suya, llëbo owa shäryara nopgarë li kjishko dö llëm, shärye eni, llëbo owa shäryara epgarë om go li kjishko bakoe.

⁴ Pak ëre tjwlö ara. Gueniyo ëye opyë pak ëre shäryë om go llëme. Woyde ga rokaga Sbörë, Aarón rokara sorë ga eni.

⁵ Cristo opyono pak tjwlö ara ëre shäryë om go llëm bakoe. Sbö tjlëno ba kong ga

«Pja bor Wa;

eeri ga tja öötong beno sök bop Data.»*

⁶ Ga tjlëno ba kong obi ga

«Pja ber shäng syöshtaga İyado wlo,
Melquisedec dik.»†

* 5:5 Salmo 2.7. † 5:6 Salmo 110.4.

⁷ Jesús shäng kjok ëre kjing go obishko ga miyde ga Sbö dbo ara, e döya eshko dwayo wlo, wolon llëm wlo. E kjïshko ga kjloshtono ba kong jlökoyo, slatong ara boryo go. Ga Sbö bangkjrara ara kuzong ga llëye lara li kura.

⁸ Gueniyo e Sbö Wa ëmdë ga llëbo weno ba kong owa ara kjïshko ga oppino Sbö kolë jlökoyo.

⁹ Ga llëye woydara Sbörë shärye wlo li shäryara uunkong pjirshko ga öötong beno sök ba kolagaga uunkong li döga, epga ber löng së iyado wlo,

¹⁰ ga iara Sbörë beno shäng syöshtaga kësbangyo, Melquisedec dik.

Shji Sbö rayë llëme

¹¹ Llëbo lërwa woydë bomi kong ara ëre kjïshko, gueniyo lërwa wlo ga kjang, pjây kä kjang kjïshko.

¹² Pjây mär löng Jesús go dbar kop ara tjän. Pjây oppino pjlu kjwe ga eerishko ga pjây opyono beno löng no pingga. Gueniyo Sbö tjlökwö kjrëmi löng li llë loklo miydëmi löng llëm obi. Woydëmi ga pjây pïya oblërë tjlökwö wëlä go eröe. Kjwozirga löng nä ië wleniyo, e dli uë woydë llëme. Pjây so e kjoyo, tjlökwö kjang li kumi woydë llëm kjïshko.

¹³ Nopga so kjwozirga löng nä ië kjoyo li, e jëk löng pjlo bek sorë li miydayde lok llëm obi.

¹⁴ Gueniyo tjlökwö kjang li, e dli wleni, ga nopga so këkboga kjoyo li, e opping ara e go, ga llëbo pjluë, de owa, e miyde löng pjluë.

6

¹⁻² Bäm go ga tjlökwö laraba bomi kong ara. Cristo tjlökwö wëlä li laraba bomi kong. Llëbo owa shäryë löng li, e rayë sorë, shji wolon llëm

wlo, e laraba bomi kong. Shji mär Sbö go sorë, e laraba bomi kong. Shji wë sorë, e laraba bomi kong. Shji orkwo ië ëng kjing go sorë, e laraba bomi kong. Nopga wolono löng'li woshрэ iröng obi sorë, e laraba bomi kong. Llonogaga nopga shdüya Sböre iyado wlo sorë, e laraba bomi kong bakoe. Tjlökwo uunkong ëre laraba bomi kong pjiir tjan. Gueniyo woyde gaga e lanyotkëy ame, shji opping tjlökwokjang li go dey, nopga wotjlik këkbogadik wleni.

³ Woyde Sböre wleni gashäryëy eni.

⁴⁻⁶ Eye tjlökwoli kjrono, garayara garokëy iröng obi ber löng Sbö tjok ga äe. Llëbo owa shärye löng li, e owa jlöe le ame, garaye ame bakoe. Llëbo twara Sböre ba kong li kjrara lok tjan. Epga ëng dowlëno Sbö Sëya tjok. Miydara lok pjiir tjan ga Sbö tjlökwok, e pjlúe. Sbö Wa tjwe iröng obi dbo ara go sorë, e miydara lok pjiir bakoe. Eni gaga Sbö Wa li rayarashko gaga e zröra lok lök pjang kjlös go jek obi wleni, gaga iara lok beno shäng joywëba wlo bakoe.

⁷ Kajok buk kjrina. Shunyo shrë ba kjing goshko gadi li shura klung sho lirë, gadwla botjyono pjlú, nopga parkë löng eshko li kongshko gaga Sbö ber wopjlú kjok li tjok.

⁸ Gueniyo e wen shkø sho, kjlo sho oblë oblë llëno llëm wleniyo gaga Sbö ber wopjlú ba tjok llëme. Llonogaga e sukoba pjire.*

* **6:8 Kajok** le li, e **nopga** loklo. **Shunyo** le li, e **llëbo shärye Sböre nopga kong pjlú** li loklo. Eni gaga llëbo shärye Sböre nopga kong pjlúshko gaga shji llëbo shäryë ba tjok pjlú gaga Sbö ber wopjlú bi tjok. Gueniyo shji llëbo shäryë ba tjok owa gaga Sbö ber wopjlú bi tjok llëm, gaga shji shdüya.

9 Pjeyoga, tjawa lan bomi tjok eni ëmdë ga miydërwa ga pjây opshäryë owa eni llëme. Eye dëktong ga woyde ga llëbo shärye pjluë. Ga miydërwa ga pjây omshäryë eni.

10 Sbö woydëmi ara kjïshko ga ba nopga kjimtoromi ara, ga shäryëmi löng eni obi. Sbö wotjlik bek iyado, ga llëbo shäryëmi löng li woyojeya llëme.

11 Woydërwa ga pjây omshäryë eni jlökoyo, äär jong llëbo koshëmi löng li shäryono pjir guing.

12 Woydërwa ga pjây opyë löng shmi jong wleni llëme. Eye kwleya mär Sbö go llëm ga llëbo twe Sbörë ba nopga kong lara li kjre lok jlökoyo. Woydërwa ga pjây omshäryë eni bakoe.

Tjlökwo lara Sbörë jlökoyo li, e shäryë eni

13 Eye tjwlö ara Sbö kjinmo llëme. E kjïshko ga Sbö tjläno Abraham kong jlökoyo dënashko ga tjlökwo li lara ba ko om go li go.

14 Eshko ga tjlä ga «Pja kjimtër ara. Bop tjëyo tek ber bop irgo li iër ber shdär träk llëme»† le.

15 Kuya ga beno shäng ba koshë wopjlu, ga llëye lara li kjrara beno ba kong.

16 Nopga tjlökwo lë oblë kong jlökoyoshko ga tjlökwo le oblë tjwlö ara ba kjinmo li ko goshko, ber ba miydaga wlo. Shäryara eni ga jlöe lëba.

17 Eni ga Sbö tjläno jlökoyoshko ga woydara ga miydëba ga tjlökwo li shärye jlökoyo, ga kjlopswe llëme. E kjïshko ga tjlökwo li lara ba ko om go li go.

18 Sbö jyörkë llëme. Llëye le jlökoyo li, e shärye kjuwe. Llëye le ba ko go li, e shärye kjuwe bakoe. Ga shji töktong ba shwoy, ga rokoroy ba kong ga

† 6:14 Génesis 22.17.

shji döya. Eni ga miydëy ga llëye lara li shärye eni kuzong ga shji beno löng wopjlué.

¹⁹⁻²⁰ Eni ga miydëy pjlú ga llëye koshëy löng li, e shäryë eni. E kjishko ga shji wotjlik oblë oblë llëm, shji wotjlik ber löng kjrinaso eröe. Shji mär ber löng Jesús go. E öötong sök Sbö bokshto kjok dogo bi häm go, ga beno shäng syöshtaga kësbangyo iyado bi kjishko, Melquisedec dik.

7

Syöshtaga Sbö kong ko Melquisedec

¹ Melquisedec, e dënashko ga Salem so pjluyo, syöshtaga Sbö Tjwlõ Kësbangyo kong ba pjeyoga kjishko bakoe. Pjlara ga Abraham öör shäng ëngkjwë pjlupga oblë tjok, ga zanae. E irgo ga jek shäng irbo, to ba ushko wlo ga wlokjrara Melquisedecdë, ga tjläno beno pjlú ba kong.

² Eshko ga llëbo wlëna Abrahamdë kës li shtara äär ba sakyö (10) go, ba sakyö (10) go, shira kj-rina kjrina, ga twara ba kong. Melquisedec, e no pjluyo, llëbo pjlo bek shäryaga li loklo. Ga Salem, e wlëp loklo. Eni ga kowëba Salem so pjluyo li, e beno no pjluyo, nopga iaga ber löng wlëp loklo.

³ Data ë, mekë ë, kjokëga ë, e miydëy llëme. Weno buk llonoshko, wolono llonoshko, e miydëy llëm bakoe. Eni ga beno syöshtaga iyado, Sbö Wa dik.

⁴ E tjwlõ kjöm li woyotjläzä. Abraham, e bi tjlapga tek dënashko so tjwlõ ara anmoyö ëmdë ga pjlupga zanashko ga llëbo wlëna kës li twara ba kong kjrina.

⁵ Syöshtagaga Leví tjëyo lira, llëbo tak pjang kjok llgwekklo tara Moisésdë li go ba kjishko. Tjlë ga

Abraham tjëyoga llëbo wlëkshko ga woyde ga shte lok, ga äär ba sakyö (10) go, ba sakyö (10) go ga shiya kjrina kjrina, ga twe ba kong lok, uunkong li pjeyoga dö gueniyo.

⁶ Gueniyo domer li, e Leví tjëyo llëme. Ga Sbö tjlëno jlökoyo li, e beno Abraham kong. Eni ëmdë ga llëbo wlëna Abrahamdë li, e twara ba kong kjrina, ga kar tjlëno beno pjlú ba kong.

⁷ Miydëy ga ëye tjlëno beno pjlú oblë kong ga e tjwlö ara ba kjinmo.

⁸ Llëbo twëba syöshtagaga Leví tjëyo kong eni. Gueniyo miydëy ga llono ga epga wolon. Domer kong llëbo twara Abrahamdë li, era wolono sorë, llonoshko, e tak pjang Sbö tjlökwo go llëme. E kjishko e sök së obi wleni.

⁹⁻¹⁰ Tjwlö shigaga li, e Leví tjëyoga, ga Leví, e Abraham tjëyo. Abraham wlokjrara domer lirëshko ga Abraham wapga llëm obi. Eshko ga Leví, ba tjëyoga kës, e tjeng Abraham tjok obi wleni. E kjishko ga llëbo twara Abrahamdë ba kongshko ga epga omtwono ba kong wleni bakoe.

Jesús, e Melquisedec dik

¹¹ Kjek llgwekklo twara Sbörë nopga li kongshko ga Leví tjëyoga iara beno löng syöshtaga ba kong nopga li kjishko. Eshko ga domer iara beno syöshtaga kësbangyo bäm go li, e Aarón. Gueniyo ëye ie syöshtaga eniyorë ber pjlo bek Sbö bokso ga äe. E kjishko ga syöshtaga woydara oblë wleniyo, gueniyo Aarón dik llëm, Melquisedec dik shara.

¹² Eni ga syöshtaga bäm go wleniyo li kje Sbörë, äska ie ber oblë wleniyo wlo ga woydara ga kjok

llgwekklo bäm go wleniyo li kje bako, ga äska ie ber oblë wleniyo.

¹³⁻¹⁴ Syöshtaga oblë wleniyo tak pjang Sbö tjlökwo go ëre, e bi Tjlapga Jesús. Gueniyo era Leví tjëyo llëme. Miydëy pjlú ga e Judá tjëyo, ga epga iara Moisésdë parkë syöshtaga Sbö kong öng sho sukklo jong lishko llëme.

¹⁵ Syöshtaga weno shäng kjlara oblë wleniyo, Melquisedec dik. Uunkong ëre miydëy wëlä e kjishko.

¹⁶ Kjuk llgwekklo li tjlë ga ëye äär ber shäng syöshtaga wlo ga woyde ga e Leví tjëyo. Gueniyo Jesús öötong shäng syöshtaga e kjishko llëme. E öötong shäng syöshtaga, e wolon ame kjishko,

¹⁷ tak pjang Sbö tjlökwo go sorëli eni. Tjlëno beno eni:

«Pja ber shäng syöshtaga ñyado wlo,

Melquisedec dik.»*

¹⁸⁻¹⁹ Kjuk llgwekklo tek dënashko so li, ëye ie ber pjlo bek Sbö bokso ga äe. E llëno llëm wleni. E kjishko ga iara Sbörë beno tjwlo ame, äska iara beno oblë, pjlú ba kjinmo. Ère go ga eerishko ga shji äär ber löng Sbó bokshto, lan ba tjok wlo ga pjlúe.

²⁰ Sbö om go tjlëno jlökoyo, Jesús kjishko. Tjlëno eni, syöshtaga tek dënashko so li kjishko llëme.

²¹ Jesús iara beno shäng syöshtaga lishko ga tjlë ga

«Tjlapga tjlëno jlökoyo,

ga opkjloswë ber wotjlík oblë llëme.

Tjlë ga

* **7:17** Salmo 110.4.

“Pja ber shäng syöshtaga ÿyado wlo” le.»

²² Miydëy e go ga tjlökwö tjaqlën ëre ie Jesúsde ber pjlú, tjlökwö bäm go li kjinmo.

²³ Syöshtagaga tek dënashko so li arae. Ëye parkë ber löng ÿyado wlo ga ä, epga uunkong wolon kjishko.

²⁴⁻²⁵ Gueniyo Jesúsda sök ÿyado, ga ber shäng syöshtë Sbö kong, nopga mär ba go äär Sbö boksho wlo li kjishko ÿyado. E kjishko ga epga döya ber löng ÿyado wlo ga pjlúe.

²⁶ Syöshtaga kësbangyo woydëy wleniyo li e. E jëk shäng pjlo bek ÿyado, pogo llëye dret Sbö bokso, nopga owa dik llëme. Ga iara Sbörë beno shäng dboy ba kong, söra öötong sök kjok dogo, iara beno tjwlö ara, llëbo tjeng kës li kjinmo.

²⁷ E syöshtagaga kës-kësyo oblë dik llëme. Tek bäm goshko ga öng zröya dbar kjwobi go, ga sho suya, pjë drete. Bäm go ga shärye eni, owa shäryara om go li potjwlëkklo. E irgo ga shärye eni, owa shäryara nopgarë li potjwlëkklo bakoe. Jesúsda opshäryë eni llëme. E optwono pjaraso, beno llëbo owa shäryara nopgarë kës li potjwlëkklo.

²⁸ Domerga iara kjok llgwekklo lirë beno löng syöshtagaga kës-kësyo li, e dbo ara llëm, jëk löng pjlo bek ga äe. Gueniyo kjok llgwekklo li twara Sbörë irgo ga tjlökwö lara oblë jlökoyo. E go ga ba Wa iara beno shäng syöshtaga kësbangyo ÿyado wlo. Era öötong beno pjlo bek ÿyado.

8

Syöshtaga kësbangyo oblë wleniyo, tjlökwö oblë wleniyo

¹ Llëye lër shäng bomi kong li eni. Shji syöshtaga kësbangyo sök kjlara. E öötong sirkeno sök kjok dogo, Sbö orkwo këlëkong, shtoyo tjwlõ ara an-moyõ lishko,

² ga parkë shäng Sbö u jong eshko li roshko. U li shäryaga Tjlapgarë, shäryaga norë llëme.

³ Syöshtagaga kësksyo uunkong iara beno löng llëbo twe Sbö kong, öng sho suya ba kong bakoe. E kjishko ga woydara ga llëbo twe Jesúsde Sbö kong bakoe.

⁴ Kjok ëre kjing goshko ga syöshtagaga tjok, ga parkë löng llëbo twë Sbö kong, tak pjang kjok ilgwekklo go sorë li eni. E kjishko ga Jesús sök kjok ëre kjing go obi kjwe ga e ber syöshtaga llëme.

⁵ Syöshtagaga li parkë löng Sbö u jong kjok ëre kjing go li roshko. E so ba u jong kjok dogo li kjoyo, gueniyo äär eni llëm, e ba jyäglo erä. E kjishko ga Sbö u shäryak öng kwota go li shärye Moisésde shäng kjwlëshko ga Sbö tjlä ba kong ga «Shäryos yõtso. Llëbo jyäglo pinor bop kong dlup go sorë ga shäryos eni»* le.

⁶ Gueniyo pak twara Jesús kong li, e tjwlõ ara, pak shärye syöshtagagarë li kjinmo. E parkë syöshtaga, tjlökwo twara Sbörë tjaglën, beno iyado wlo li kjishko. Ga tjlökwo ëre tjwlõ ara, tjlökwo twara bäm go li kjinmo.

⁷ Tjlökwo twara Sbörë bäm go li, llëbo uunkong shäryara pjlú kjwe ga tjlökwo woyde oblë llëme.

⁸ Gueniyo ina Sbörë ga nopga li pjlú llëme. Tjlë ga «Tjlapga tjlä ga
“Dbar tjwe kjwara ga

* 8:5 Éxodo 25.40.

Israel tjëyoga kong,
 Judá tjëyoga kong,
 tjlökwö twër kjrina obi tjaglën.

⁹ Dënashko ga ba tjlapgaga,
 e orkwo sharor wleni,
 ga shiror tek Egipto kjokyo dwayo.

Eshko ga tjlökwö tworor ba kong, beno ñyado wlo,
 gueniyo kolara lok llëme.
 E kjïshko ga tja opakjono ba shwoy dwayo.

E kjïshko ga tjlökwö twër tjaglën li,
 e ber tjlökwö tworor ba kong dënashko li dik
 llëme” le.

Tjlapga tjlä obi ga

¹⁰ “Tjölkwö tworor, beno ñyado wlo bäm go li, e pjir.
 E irgo ga tjölkwö twër Israel tjëyoga kong, ber
 ñyado wlo li eni.

Bor kjok llgwekklo li tër ber pjang ba wotjlik li go,
 tër ber pjang ba pplugwo go bakoe.

Tja ber ba Sbö,
 ga epga ber bor nopga bakoe.

¹¹ Eshko ga tja miyde nopga uunkongdë,
 nopga tjwlö chira äär jong nopga tjwlö ara go.

E kjïshko ga ëye oblë ping bor tjölkwö go ame,
 ëye ba kjlara ichë bor miydë ame bakoe.

¹² Eshko ga owa pjang ba go li lön ber dret,
 ga owa li woyoshrër ame” le.»[†]

¹³ Tjölkwö ëre kowara tjaglën kuzong ga miydëy e
 go ga tjölkwö bäm go li iara beno tjwlö ame. Ga
 llëye këguë, tjwlö llëm ga wop ä ga jeno pjire.

[†] **8:12** Jeremías 31.31-34.

9

Sbö u jong kjok ëre kjing go

¹ Tjłkwo twara Sbörë, beno ñyado wlo bäm go li kjibokwoyo goshko ga tjłkwo tak lok oblë oblë, beno Sbö poshrëya sorë li miydoklo, ba u kjok ëre kjing go shärye sorë li miydoklo bakoe.

² Eni ga Sbö u shäryara lok kjwara öng kwota go. Roshko kjër jong kjwara, e kowara lok shto zrek. Eshko ga iök shjiy bapkwö jong kjwara, ga pjlung shosho suk pjir iak beno tjeng dboy Sbö kong li tjeng ba ioklo jong li kjing go bakoe.

³ U li roshko shwong iak pjang kara kësbange. E pjlor kalëkong kjër jong kjwara obi, e kowara lok shto zrek anmoyö.

⁴ Eshko ga llëbo lõ pjlëblë sukklo jong kjwara, shäryak dbur sho shöylör go. Sbö tjłkwo woyoshroklo bapkwö poglo shtik dbur sho shöylör go li jong eshko bakoe. Roshko *maná* tjeng sira, ba bapkwö shäryak dbur sho shöylör go li roy, Aarón kjorkung pönglä weno pjlara li buk eshko, ak kjwangyo goshko tjłkwo twara Sbörë tak lok li tjeng eshko bakoe.

⁵ Tjłkwo woyoshroklo bapkwö li kjing go Sbö parkagaga kjok dogo so sjägä tjok wleniyo li jyäglo tjeng do pjök, ba sjägä jyäglo li tjeng tjłkwo woyoshroklo bapkwö kjing dokklo li kopshko, owa pjang nopga go li lõya Sbörë lishko. Eni tjok ga llëye lër e kjışhko wlo ame.

⁶ Llëbo uunkong ëre shäryara lok pjir irgo ga dbar kjwobi go ga syöshtagaga Sbö kong nopga kjışhko li,

ba pak li shärye dloyo öötongshko ga opzrëk jek kjër jong bäm go li roshko.

⁷ Gueniyo ëye opzrëk jek kjër jong këm kjwara obi li roshko llëm, syöshtaga kësbangyo li eröe. Lu pjlobi go ga opzrëk jek eshko pjlaraso döe. Ga opzrëk wlo ga öng srëng söya tjeng ba tjok, llëbo owa shäryara om go li potjwlëkklo, llëbo owa shäryara nopgarë miyde löng llëm wleniyo li potjwlëkklo bakoe.

⁸ Llëbo uunkong ëre shäryara lok eni, tjlökwö twara Sbörë ba kong bäm go li kjïshko. Ëre go ga shji pïya Sbö Sëyarë ga tjlökwö bäm go li pjang obishko, Sbö u li jong obishko ga ëye opzrëk jek shto zrek anmoyö lishko ga äe.

⁹ Eerishko ga miydëy e go ga öng llë tworoy, sho suroy Sbö kong eni ga shji opyë ber löng wotjlik pjlo bek ba bokso e go wlo llëme.

¹⁰ Tjlökwö tak lok bäm ëre go ga nopga oppino ië sorë, wë sorë, äär Sbö poshrëk ba ushko ga pjlu wlo. Gueniyo tjlökwö li beno tjwlö tjok, äär jong tjlökwö tjanglën li tjweshko jä.

Cristo srëng

¹¹ Gueniyo ga Cristo öör tjän, ga öötong beno shäng syöshtaga kësbangyo bi kjïshko. Llëbo pjlu tjeng eerishko kës li söga erë. E parkë Sbö u jong pjlo bek, pjlu anmoyö lishko. Sbö u ëre shäryaga norë llëm, e kjok ëre so llëm bakoe.

¹² Cristo opzrëno jek eshkoshko ga öng srëng söra llëm, shwling ushko so srëng söra llëm, sögla wlënggla srëng söra llëm bakoe. Ba srëng onmo lira söra jek ba tjok, ga opzrëno jek shto zrek anmoyö

jong eshko li roshko pjaraso, ber sök eshko ñyado wlo. Shji dõra bi shdunglo dbo dorko dwayo ñyado wlo eni.

¹³ Dënashko ga öng zrõraba, sho suraba Sbõ kong, llëbo owa shãryara li potjwlëkklo, ga shwling ushko so srëng, sögla srëng, sögla sho pjono dret, ba pjlungyo, e sguinaba nopga pogo llëbo owa li kjing go, ie ber löng äär Sbõ poshrëk ga pjlu wlo.

¹⁴ Cristora pogo llëye dret Sbõ bokso. Ga Sbõ Sëya dbo go ga optwono Sbõ kong, wolono, srëng kwono bi kjishko, owa pjang bi go li löya ber dret wlo. Dënashko ga shji löng wolon wlo, llëbo owa shãryoroy li kjishko. Gueniyo shãryara eni, shji ber löng parkë Sbõ Sök ñyado li kong wlo.

¹⁵ Tjlõkwo tjaglën li shãryaga beno Cristorë e kjishko. E wolono, nopga rokara Sbõrë li döya ba shdunglo tak pjang tjõkwo bãm go li dbo dorko dwayo wlo, llëbo pjlu twe Sbõrë ba nopga kong ber ñyado wlo lara jlõkoyo li kjre lok wlo.

¹⁶⁻¹⁷ Shji löng së obishko ga shji kjibokwo të, ber shji wolonoshko ga bi llëbo li ber ë kong li miydoklo wlo. Tjlõkwo tjaglën ëre, e so kjibokwo e kjoyoe. Kjibokwo li tjwlõ tjok wlo ga woyde ga ba taga wolono guing. Shãng së obishko ga kjibokwo li tjwlõ llëme.

¹⁸ E kjishko ga tjõkwo twara Sbõrë bãm go li, e tjwlõ tjok wlo ga woydara ga öng llë zrõkoba, srëng li kwongoba wlo.

¹⁹ Tjlõkwo uunkong tara kjok llgwekklo kjibokwoyo go li lara Moisésdë nopga kong pjirshko ga sögla wlënggla srëng kjrara sira, shwling ushko so srëng kjrara sira, ga pjöyikong li rorwara di tjok. E

irgo ga kjor so shkwë sho kjoyo kowo kjrara kjlëbö, pjrrira öng wlëp ushko so zok pjlo srëzrën go, pöra srëng rorwak di tjok li go, ga sguina kjok llgwekklo kjibokwoyo li kjing go, nopga uunkong li kjing go bakoe.

²⁰ Eshko ga tjlä ga «Tjläkwo ëre lara Sbörë, beno iyado wlo, shäryëmi wlo. Srëng ëre kjishko ga tjläkwo li ber tjwlö tjok»* le.

²¹ Srëng li sguina Sbö u jong eshko li kjing go, ba llëkso bokso tjeng eshko kës li kjing go bakoe.

²² Srëng kwono llëm ga owa pjang nopga go li löya Sbörë llëme. E kjishko ga epga ichara kjok llgwekklo lirë llëbo ie ber tjeng dboy Sbö kong wlo ga woyde ga shärye srëng go. Epga ichara ba shäryë eni llëbo uunkong tjok seke.

²³ Llëbo uunkong ëre, e llëbo tjeng kjok dogo li jyäglo. E kjishko ga woydara ga ie ber tjeng dboy Sbö kong eni. Gueniyo llëbo tjeng kjok dogo li ber tjeng dboy Sbö kong wlo ga woyde ga shärye llëbo tjwlö ara, öng kjinmo li go.

²⁴ Sbö u jong kjok ëre kjing go li, e Sbö u jlökoyo li jyäglo, e shäryaga norë bakoe. Cristo opzrëno e roshko llëm, opzrëno jek Sbö u jong kjok dogo li roshko, ga beno shäng eshko Sbö bokshto, shji kjimte wlo.

²⁵ Lu pjlobi ga syöshtagaga kësksyo opzrëk jek shto zrek anmoyö li roshko, ga öng srëng söya jek ba tjok. Cristora opzrëno jek pjlaraso döe.

²⁶ Eni llëm kjwe ga woyde ga zrökoba kop ara, kjok ëre shäryara Sbörë tek lëkong. Gueniyo weno shäng pjlaraso iyado wlo, optwono wolono, owa

* 9:20 Éxodo 24.8.

pjang nopga go li löya ber dret wlo.

²⁷ Shji nopga wolon pjaraso wlo. E irgo ga shji llgweya Sböre wlo.

²⁸ Eni wleni ga Cristo wolono pjaraso, owa pjang nopga go li löya ber dret wlo. Ga llono ga wen jek pjara obi, gueniyo tjwe shäng owa pjang nopga go li löngga llëm, tjwe shäng ba koshagaga löng li döga shara.

10

Cristo wolono pjaraso, nopga uunkong kjishko

¹ Kjek llgwekklo tara Moisésdë li, e llëbo wen tjwe pjlu li jyäglö eröe. Llëbo wen tjwe pjlu li, e oblë. E kjishko ga lu pjlobi go ga nopga öng zrök, sho suk, pjë dret Sbö poshrëkklo, tak pjang kjok llgwekklo go sorë li eni ëmdë ga ëye ie ber pjlo bek Sbö bokso ga äe.

² Epga, owa pjang ba go li löna Sböre beno dret ñyado wlo kjwe ga beno löng pogo llëye dret Sbö bokso. Eni kjwe ga öng zröya, sho suya ame ga pjluë.

³⁻⁴ Miga owa pjang oba go li löya Sböre ber dret, söglä llgwoklë srëng kjishko llëm, shwling ushko so srëng kjishko llëm bakoe. E kjishko ga öng zröya, sho suya lu pjlobi go. E ber epga pogo llëbo owa tjok li miydoklo.

⁵ E kjishko ga Cristo shrono shäng kjok ëre kjing goshko ga tjle Sbö kong ga

«Öng zröraba, sho suraba bop kong li woydorop llëm,
llëbo twaraba bop kong li woydorop llëm bakoe.

E äska doyo poshäyöröp bor kong.

6 Öng zröraba, sho suraba, pjonö dret bop poshrëkklö li,
öng zröraba, sho suraba, llëbo owa shäryaraba li
potjwlëkklö li,
e beno pjlú bop kong llëme.

7 E kjishko ga tja tjlë ga “Sbö, tja shäng na,
ga tja shrono shäng llëye woydëp ga shäryër
li, e shäryaga, tak pjang bor kjishko bop kji-
bokwo go sorë li eni” lër eni» le.*

8 Bäm go ga tjlë ga «Öng zröraba, sho suraba bop kong li, llëbo twaraba bop kong li, öng zröraba, sho suraba, pjonö dret bop poshrëkklö li, öng zröraba, sho suraba, llëbo owa shäryaraba li potjwlëkklö li, e woydorop llëm, beno pjlú bop kong llëm bakoe» le eni. Tjlëno eni, epga ichara kjok llgwekklo lirë ba shäryë eni gueniyo.

9 E irgo ga tjlë ga «Tja shäng na, ga tja shrono shäng llëye woydëp ga shäryër li, e shäryaga» le eni. Eni ga tjlökwo twara Sbörë bäm go li kjara, äska tjlökwo tja glën li shärye wlo.

10 Eni ga Jesucristo wolono pjaraso nopga uunkong kjishko, woydara Sbörë sorë li eni. Ga shji iara Sbörë beno tjeng dboy ba kong e kjishko.

11 Syöshtagaga Sbö kong li, ba pak li shärye lok dbar kjwobi go, öng zröya, sho suya Sbö kong, owa pjang nopga go li löya Sbörë e kjishko llëm gueniyo.

12 Gueniyo syöshtagaga bi kong lira wolono pjaraso, owa pjang nopga go li löya ber dret

* 10:7 Salmo 40.6-8.

wlo pjiŕshko ga öötong sirkeno sök Sbö orkwo këlëkong.

¹³ Eshko tek lëkong ga beno sök ba moskwoga zana Sbörë pjiŕ guing, ga twara beno ba kong iche wlo li koshë.

¹⁴ Wolono pjiŕaraso kuzong ga nopga ie ber tjeng dboy Sbö kong li iara beno pjiŕo bek Sbö bokso iŕyado wlo.

¹⁵ Sbö Sëya tjilëno bi kong ëre kjishko bakoe. Tjilë ga

¹⁶ «Tjilökwo tworor, beno iŕyado wlo bäm go li, e pjiŕ. E irgo ga tjilökwo lër ba kong jlökoyo li eni.

Bor kjok llgwekklo li tër ber pjang ba pjiŕugwo go, tër ber pjang ba wotjlik li go bakoe» le.†

¹⁷ Ga tjilë obi ga
«Llëbo owa shäryara lok li,
e woyoshrër ame» le.‡

¹⁸ Eni ga owa pjang bi go li löna Sbörë beno dret eni kuzong ga öng zröy, sho suy, llëbo owa shäryoroy li potjwlëkklo ame.

Shji mär Sbö go iŕyado wlo

¹⁹ Eni ga pjeyoga, Jesús srëng li kjishko ga shji opzrëk jek shto zrek anmoyö lishko ga pjiŕú, llëye bangkjërëy llëme.

²⁰ E wolono li, e irbo tjaŕglën wleni, ga e go ga shji jek äär Sbö sök lishko ga pjiŕú, shwong pjang kësbang li pjiŕor kalëkong.

²¹ Cristo öötong beno shäng syöshtaga kësbangyo, shji Sbö nopga kjishko.

²² Shji iara beno pjiŕo bek Sbö bokso, bi wotjlik owa li kjing go srëng sguing wleni, bi doyo wak pjiŕ

† 10:16 Jeremías 31.33. ‡ 10:17 Jeremías 31.34.

di drëpdrë go wleni bakoe. E kjîshko ga shji to Sbö shwoy, shji mär ba go jlökoyo.

²³ Tjlökwo laga bi kong jlökoyo li, llëye le li shärye eni. E kjîshko ga woyste ga llëye koshëy lönng li lëy ga miydëy ga eni jlökoyo.

²⁴ Shji ëng kjimtë kar kar, shji oblë woyste ara wlo, shji llëbo pjlú shäryë wlo bakoe.

²⁵ No kjone kjone tön ëng tjok ame. Shjira omshäryë eni llëm, shji tön ëng tjok, shji ëng kjimtë dbokjrë wlo dey. İy ga Tjlapga Jesús tjwe irönng obi dbaryo li dörö ga woyste ga shäryëy eni jek këgong këgong.

²⁶ Tjlökwo bek li miydoroy pjir ga shji jëk lönng llëbo owa shäryë obi wleni ga llëbo zröy ber llëbo owa shäryoroy li potjwlëkklo wlo oblë drete.

²⁷ Shäryoroy eni wleni ga miydëy ga shji ber lönng llgweya, shdüya Sbörë iök pjë jong ri ri li go, ba wloyoga tjok li koshë erä.

²⁸⁻²⁹ Dënashko ga ëye, kjok llgwekklo tara Moisésdë li kole woyste llëm ga İga pjökde, myare dö ga zröya lok jekdo, songe le llëme. Ba shdungglo li kjange. Gueniyo ëye, Sbö Wa tjlokwo li kole woyste llëm, e wolono, srëng kwono li iara beno tjwlö llëm, ga Sbö Sëya wotjlino ba kjimtë lara, gueniyo kar läywara owa ga ba shdungglo li ber kjang e kjinmo.

³⁰ Miydëy ga Sbö tjlëno ga «Ëye llëbo owa shäryono ga llgwega ber tjarë, shdungga ber tjarë bakoe.» Š Ga tjlëno obi ga «Tjlapga, e ber ba nopga baİya li llgwega.»*

Š 10:30 Deuteronomio 32.35.
Salmo 135.14.

* 10:30 Deuteronomio 32.36;

31 Sbö sök ñyado. Ëye lon ba wloshko, shdüya wlo ga e ba kong ga llëbo pjlú llëme.

32 Tjlökwo kuromi, kjrromi kjwlëshko ga llëbo weno bomi kong owa kës li, e woyoshrozña. Eshko ga kuromi kjange.

33 Olö ga pjây lãywaraba owa nopga uunkong boksho, pjây shdunaba ara eni bakoe. Ga bomi pjeyoga kong llëbo shäryaraba eni li ñnomi ga pjây töno ba tjok, llëye bangkjrromi llëme.

34 Sbö nopga löng kjërshko li† songe loromi. Bomi llëbo döraba bomi shjiryoshko ga kuromi löng wopjlú, miydoromi ga pjây llëbo tjeng kjok dogo pjlú anmoyö, pjir llëm wleniyo kjëshko.

35 Eni ga pjây wosonkë llëm, pjây mär Sbö go ñyado dey. Shäryoromi eni ga pjây potjwlëya ara.

36 Llëye wen bomi kong owa ga kumi kjange. Eni ga llëye woyde Sbörë li shäryoromi eni ga llëye twe ba nopga kong lara li, e kjrëmi jlökoyo,

37 tak pjang ba tjlökwo go sorë li eni. Tjlëno beno eni:

«Ëye tjwe le ga tjwe jlökoyo,
tjwe döröe.

38 Ëye mär bor go ga
era ber pjlo bek bor bokso.

Gueniyo mär bor go ame wleni ga
tja ber shäng wopjlú ba tjok llëme.»‡

39 No kjone kjone mär ba go ame, ga llono ga pjir. Shji bañya dik llëme. Shji mär ber löng ba go, ga llono ga shji där.

† 10:34 **Sbö nopga löng kjërshko** le li, e **Sbö nopga löng kjërshko mär Jesús go kjëshko** li lo klo. ‡ 10:38 Habacuc 2.3-4.

11

Shji mär Sbö go

¹ Shji mär Sbö goshko ga llëye ïgöy llëm li, e koshëy, ga miydëy ga llono ga shäryë eni jlökoyo lëy.

² Bi tjlapgaga tek dënashko so mär ba go kjïshko ga Sbö beno wopjlú ba tjok.

³ Shji mär Sbö go kjïshko ga miydëy ga kjok shäryara uunkong ba tjlökwo go, llëbo ïy löng li shäryara llëbo ïgöy llëm li go.

⁴ Dënashko ga Abel mär Sbö go kjïshko ga llëbo sura ba kong pjlú, llëbo sura Caïndë li kjinmo. Mär ba go kjïshko ga beno pjlo bek ba bokso, ga Sbö beno wopjlú ba tjok, llëbo sura li tjok bakoe. Ga wolono ëmdë ga mär ba go kjïshko ga shji opping ba go ga pjlú obi.

⁵ Dënashko ga Enoc mär Sbö go kjïshko ga to söra kjok ëre kjing go dwayo, wolono llëme. Wlënaba llëm, söra kjïshko. Söyde llëm obishko ga llëbo shäryara beno pjlú Sbö kong.

⁶ Ëye mär Sbö go llëm ga llëbo shärye ber pjlú ba kong ga äe. Ëye äär Sbö shwoy wlo ga woyde ga woyotjlïya ga sök jlõe le guing, woyde ga woyotjlïya ga ëye omwlëk ga potjwlëya jlõe le guing bakoe.

⁷ Dënashko ga Noé mär Sbö go kjïshko ga Sbö tjlëno ba kong llëbo ïyde llëm obi li kjïshkoshko ga tjlökwo kjrara, Sbö bangkjrara, ga kyyong shäryara kësbang, ba pjeyoga dökklo. Eni ga nopga löng kjok ëre kjing go li iara beno löng shdüya Sbörë wlo, gueniyo Noéra iara beno pjlo bek ba bokso.

⁸ Dënashko ga Abraham mär Sbö go kjïshko ga ichara to kjok shto oblë twe ber ba kong

lishkoshko ga kolara, ga to kjone miydara llëm ëmdë ga opshino jeke.

⁹⁻¹⁰ Ga mär Sbö go kjishko ga öötong beno sök kjok twe ba kong lara lishko, no shto oblë so wleni. Kjok buk kjrina kjok dogo, shäryaga Sbörë ber ÿyado wlo. Kjok li koshara Abrahamdë, äär ber sök eshko wlo. E kjishko ga sök kjok ëre kjing go obishko ga beno sök kjok shto oblë oblë u shäryak öng kwota go roshko. Ba wa Isaac, ba tjër Jacob, e omshäryono eni bako, tjlökwö lara Sbörë Abraham kong jlökoyo li twara ba kong lok eni bako kjishko.

¹¹ Ga Abraham mär Sbö go kjishko ga tjlablashko ga ba boy Sara kjröng ëmdë ga wa buk kjlara. Wa twe ba kong lara Sbörë ba kong jlökoyoshko ga tjlökwö kjrara domer lirë, miydara ga llëye le li shärye eni ÿyado kjishko.

¹² Eni ga luyo ara, wolon to ëmdë ga ba tjëyo tek beno ba irgo li shdöktong träk llëm, dbala lok kjopkwo go wleni, la sho tjeng dlung kjako wleni bakoe.

¹³ Nopga uunkong ëre wolonoshko ga llëbo twe Sbörë ba kong le jlökoyo li kjrara lok llëme. Gueniyo mär Sbö go kjishko ga ñna lok pjola dwayo wleni, ga beno löng wopjlú e kjishko. Löng kjok ëre kjing go obishko ga tjlé oba kong ga epga om go li shto oblë so wleni, kjok ëre so llëme le löng eni.

¹⁴ Miydëy e go ga to löng kjok wlëk, ber baïya jlökoyo wlo.

¹⁵ Tek opshino kjokyo baïya li woyotjlÿyde löng kjwe ga san jek iröng obi ga pjluë.

¹⁶ Gueniyo kjok buk kjrina kjok dogo pjlu an-moyö wleniyo li wlëyde löng. E kjishko ga kjok shäryara Sbörë ba kong eni, ga «Pja borwa Sbö» le

lok ba kongshko ga lökyokjre Sbörë llëme.

¹⁷⁻¹⁸ Abraham mär ba go jlõkoyore miyde Sbörë wlo ga ichara ba wa kjaraso li zrök, sho suk ba kong, ba tjlïkklo. Bäm go ga Sbö tjlë ba kong jlõkoyo ga «Isaac tjëyo tek ber ba irgo li ber bop tjëyo jlõkoyo eröe»* le. Eni ëmdë ga mär Sbö go kjïshko ga wotjlïno ba zrök lara.

¹⁹ Wotjlïk ga woshre Sbörë iröng obi ga pjlúe le, ga wlojrrara iröng obi, wolono, woshrara iröng obi wleni.

²⁰ Dënashko ga Isaac mär Sbö go kjïshko ga tjlëno beno pjlú ba wapga Jacob, Esaú kong, llëye wen ba kong llono li kjïshko.

²¹ Dënashko ga Jacob mär Sbö go kjïshko ga wolon döröshko ga tjlëno beno pjlú José wapga kong. Eshko ga kojono shäng ba kjorkung go, ga Sbö poshrëra.

²² Dënashko ga José mär Sbö go kjïshko ga wolon döröshko ga Israel tjëyoga ichara beno ba doyo sök ba tjok, epga opshik jek Egipto kjokyo dwayo dbaryo lishko.

²³ Dënashko ga Moisés data, mekë, e mär Sbö go kjïshko ga chida li jnena öötong moglo mya. İna lok ga wolësowa, ga tjlökwo lara pjlurë li bangjrrara lok llëme.

²⁴ Moisés mär Sbö go kjïshko ga öötong këguë ga kuna pjlú wa walë lirë ëmdë ga woydara ga kowëba ba wa llëme.

²⁵ Woydara ga ber shäng wopjlú dbar kjwöbö, llëbo owa shäryara kjïshko llëme. Eni ga opyono beno shäng shdungoba Sbö nopga tjok shara.

* **11:17-18** Génesis 21.12.

26 Beno shäng potjwlëya Sbörë li koshë. E kjïshko ga ba kong ga shdungoba Cristo kjïshko li tjwlô ara, llëbo tjwlô ara tjeng Egipto kjokyo kës li kjinmo.

27 Mär Sbö go kjïshko ga to Egipto kjokyo dwayo, pjlu iirkë ba kong li bangkjrara llëme. Eshko ga miyde ga Sbö ïgöy llëm li jëk shäng ba tjok. E kjïshko ga sano iröng llëme.

28 Mär Sbö go kjïshko ga Israel tjëyoga döktong tek Egipto kjokyo dwayo dbaryo shrëkklo li shäryara, ga nopga ichara öng wlëp ushko so zrök, ga srëng sguing u bäng bäng worbo shakklo li go, Israel wapga domerga bäm ïyo li zröya no pjiga lirë llëm wlo.

29 Dënashko ga Israel tjëyoga mär Sbö go kjïshko ga dipzono tek Dlung Srëzrën kjwo na lëkong, jëk löng kjok dogro kjing go wleni. Gueniyo Egipto sopga omshäryë eni wlo larashko ga shteno lok drete.

30 Ga Israel tjëyoga mär Sbö go kjïshko ga dbar kjwobi go ga Jericó kjokyo kopjrina lok pjribri shtök öötong dbargwo kjäk (7). E irgo ga kjok li kjëryo shäryak ak go li dloktong, sho ter löno töshko.

31 Eshko ga walë shäng kjlara ko Rajab, to shäng opsoynek domerga oblë oblë kong wleniyo. Mär Sbö go kjïshko ga kjok ïgaga öötong ba shwoy li wlokrara. E kjïshko ga nopga Sbö kolono llëm li zrörabashko ga era zröraba llëme.

32 ¿Llëye lër obi ga pjlu? Dbar tjok obi kjwe ga Gedeón, Barac, Sansón, Jefte, David, Samuel, Sbö tjlökwo lagaga, e lanyotkër bomi kong bakoe.

33 Mär Sbö go kjïshko ga llëbo shäryara ba kong oblë oblëe. Kjone kjone ëngkjwono pjilupga dbo ara wleniyo tjok, ga zanae. Kjone kjone nopga ichono

pjlo bek. Kjone kjone, llëbo twe Sbörë ba kong'lara jlökoyo li kjrara. Kjone kjone dbong kjamo llino.

³⁴ Kjone kjone, iök pjë jong träk llëm ga sjëra. Kjone kjone zrökoba dröng go lëbashko ga dëktonge. Kjone kjone dbo llëm ga öötong beno dbo ara. Kjone kjone ëngkjwëshko ga dbokjrono ara. Kjone kjone, ëngkjwagaga shto oblë so zana songe.

³⁵ Walëga kjone kjone, ba pjeyoga wolono li woshrono iröng obi.

Kjone kjone shdunaba ara, ga zröraba, gueniyo opdök woydë llëm, llono ga woshre Sbörë iröng obi li ber pjlu anmoyö ba kong wlo.

³⁶ Kjone kjone läywaraba owa, shporaba no shpökklo go bakoe. Kjone kjone pjriraba dröng sho go, iaraba beno löng kjërshko.

³⁷ Kjone kjone zröraba ak go. Kjone kjone zaraba tas do worbëshko. Kjone kjone zröraba dröng go. Kjone kjone to löng llaw pogo, doyono öng kwota go, dbur llëm, shdunaba ara, wosong iyado.

³⁸ Nopga eniyo tjwlö ara, nopga Sbö miydë llëm wleniyo li kjinmo anmoyö. To löng kjok dogro no llëmshko, dlup go bakoe. Beno löng guëng jong ööng roshko, klung ööng roshko bakoe.

³⁹ Nopga uunkong ëre mär Sbö go kjëshko ga Sbö beno wopjlu ba tjok, gueniyo llëbo twe Sbörë ba kong'lara jlökoyo li kjrara llëme.

⁴⁰ Shäryono eni, woydara Sbörë ga llëbo ber bi kong pjlu anmoyö kjëshko. Epga ie woydë ber pjlo bek ba bokso, gueniyo ie woydë ber eni bi tjok bakoe.

Sbö, ba wapga llgweya

¹ Epga mär Sbö go kjĩshko ga pak twara ba kong li shäryara lok pjire. Shji opping mär Sbö go ba kjĩshko ga pjlúe. E kjĩshko ga pak twara bi kong li shäryëy äär jong ba dbo go, shji sjen llëme. Llëbo lok bi go kwing ara, bi sëngglo wleni li döy, ga rayëy. Llëbo owa, shji iche jëk pjlú llëm li rayëy bakoe.

² Jesús woyotjlĩydë eröe. Bi iaga ber löng mär Sbö go li e, ga shji mär ber löng ba go ñyado ba kjĩshko bakoe. Lök pjang kjlôs goshko ga kura kjinge. Wolon eni li lökyo ara ëmdë ga lökyotkara llëme. Llono ga ber shäng wopjlú sorë li woyotjlĩyde pjang eröe. E irgo ga öötong sirkeno sök Sbö tjok, ba orkwo këlëkong.

³ Llëbo shäryara nopga owarë ba kong ara ga kura kjinge. Eni ga e woyotjlĩzi ñyado, pjäy sjen llëm wlo, pjäy wosonkë llëm wlo bakoe.

⁴ Pjäy drön löng ara, pjäy opkjë llëbo owa lishko dwayo wlo, gueniyo pjäy zröydëba e kjĩshko llëm obi.

⁵⁻⁶ Gueniyo tjlökwo lara Shörë beno ba wapga kong kjrina. E woyojeromi tjän. Tjlëno beno eni: «Pja bor wa.

Ëye woyde Tjlapgarë ara ga llgweya, opping wlo.

Ëye kjrara beno ba wa wleni ga shdüya.

E kjĩshko ga pja llgweyashko ga

ios ber tjwlo ara, pja opping wlo.

Pja wlöyashko ga

pja wosonkë llëme.»*

⁷ Wapga uunkong llgweya ba datarë, opping wlo. Eni ga llëbo wen bomi kong owashko ga

* 12:5-6 Proverbios 3.11-12.

miydozĩ ga pjãý llgweya Sbörë shäng, pjãý opping wlo. Shärye bomi kong eni, pjãý ba wapga kjĩshko.

⁸ Ba wapga llgweya uunkong. Eni ga pjãý llgweya llëm wleni ga pjãý ba wapga jlõkoyo llëme.

⁹ Bi dataga löng kjok ëre kjing go li, shji llgweya, ga bangkjrëy e kjĩshko. Eni ga shji llgweya bi Data, bi iaga beno löng së jlõkoyo lirëshko ga woyde ga kolëy.

¹⁰ Shji llgwera bi dataga löng kjok ëre kjing go lirë dbar kjwöbö, woydara ga ber pjlú bi kong kjĩshko. Gueniyo shji llgweya Sbörëshko ga era pjlú bi kong iyado, shji äär ber löng pjlo bek baĩa dik wlo.

¹¹ Shji llgwekobashko ga shji löng wopjlú llëm, shji löng woowa. Gueniyo shji oppino e go wleni ga shji ie ber löng jëk pjlo bek, wlëp bakoe.

¹² E kjĩshko ga pjãý opyos wokjang, pjãý so no jëk ga dre dbo llëm, kjrëk kjrëk erä li kjoyo llëm wlo.

¹³ Pjãý wotjlik jëk pjlo bek erä, nopga mär Sbö go jlõkoyo llëm li opping jëk pjlo bek wlo, e raye llëm wlo.

Sbö tjlõkwo kuyyõtso

¹⁴ Pjãý drön ëë, pjãý ber löng wlëp nopga uunkong tjok wlo. Pjãý jëk pjlo bek erä. Llëm ga Tjlapga ïmi llëme.

¹⁵ Sbö wopjlú li wlokjrozĩ pjãý uunkongdë, rayëmi llëme. Pjãý kjlara wotjlik owa wleni ga nopga ara iche wotjlik owa eni bako ga pjlúe. Pjãý sjëk, e shärye eni llëm wlo.

¹⁶ Shji orkwosmono ë tjok llëm ga shji pë ba tjok llëme. Sbö bangkjrozĩa. Shji opshäryë Esau dik llëm bakoe. Dënashko ga Sbö bangkjrara llëm

kuzong ga ba wa këguëyo shtoyo li soynena dli kjrina kjishko.

¹⁷ Miydëmi pjlú ga e irgo ga woydara ga ba data tjlë ber pjlú ba kong, gueniyo jlô lara llëme. Slatong ara ëmdë ga llëye shäryara li kjlopswe obi ga äe.

¹⁸ Pjäy öötong löng Sbö shwoy, Israel tjëyoga dik llëme. Epga öötong löng dlup jong kjwara lishko. Dlup li porwako llëm, pjë jong ri ri bakoe. Eshko ga kjok ro yët, pjluk ara bakoe.

¹⁹⁻²⁰ Wli pjlukyo kura lok. Eshko ga Sbö tjlë ba kong lok ga «Ëye dlup jong ëre porwono ga e zrökko jekdo ak go, öng llë ëmdë ga omporwono ga e zrökko eni bakoe»[†] le. Kuya lok ga bangkjrara lok ara, tjlökwo beno ba kong kjang anmoyö kjishko. E kjishko ga kjloshtono lok ara, llëye le ba kong ame wlo.

²¹ Moisés ëmdë ga llëye ïna li bangkjrara ara bakoe. Tjlë ga «Bangkjrër shäng dete erä»[‡] le.

²² Gueniyo kjok buk kjrina kjok dogo ko Jerusalén, e buk Sión dlupyo jong eshko li go. Kajok ëre, e Sbö Sök İyado li ĩ. Eshko ga ba parkagaga kjok dogo so tönö löng träk llëm, wopjlúe. Pjäyda öötong löng kjok eshko wleni.

²³ Jesús tjlökwo kjrägaga woyde Sbörë ara wleniyo löng eshko uunkong, ko tak lok kjok dogo li epga. Ga pjäy tönö beno tjeng ba tjok lok eshko Sbö bokshto wleni. Nopga uunkong llgwegaga li e. Nopga jëktong löng pjlo bek dënashko li iara Sbörë beno pjlo bek ba bokso, ga ba sëya li löng eshko. Ga pjäy tönö beno tjeng ba tjok wleni.

[†] **12:19-20** Éxodo 19.12-13. [‡] **12:21** Deuteronomio 9.19.

24 Pjãý öötong löng Jesús shwoy wleni bakoe. Tjłkwo tjaqlën shãryaga li e. Ba srëng kwona li kjrromi, owa pjang bomi go'li'łöya Sbörë ber dret e kjĩshko wlo. Srëng ère tjwlō ara, Abel ĩ'li kjinmo.

25 Pjãý sjëke. Sbö tjłë bomi kongshko ga kuzĩ yōtso. Dënashko ga tjłëno Israel tjëyoga kong kjok ère kjing go dwayoshko ga kura lok llëm kuzong ga epga shduna. Eni ga tjłë bi kong kjok dogo dwayoshko ga kuy llëm wleni ga jlōkoyo ga shji shdüya bakoe.

26 Tjłëno dënashkoshko ga klung iano jek dete erä. Gueniyo eerishko ga tjłë bi kong jlōkoyo ga «Llono ga klung iër ian jek obi, kjopkwo iër ian eni bakoe» le.

27 Miydëy e go ga kjok shãryara kës'li, e kje eshko, gueniyo llëbo wir llëm li, era ber ĩyadoe.

28 Sbö sök no pjluyo ĩyado kjokyo li, e wir llëme. Ga llono ga shji äär ber löng eshko ĩyado wlo. E kjĩshko ga shji wopjlú ba tjok dey, ga woyde ga poshrëy, bangkjrëy, woyde sorë li eni.

29 «Bi Sbö, e iök kjok pjikklo wleni.»§

13

Kjibokwo pjirzlong

1 Pjãý ëng woydos ara kar kar, epenga dö wleni ĩyado.

2 Nopga miydëmi llëm wleniyo äär bomi shwoyshko ga wlokjrozĩ löng wopjlúe. No kjone kjone omshãryono Sbö parkagaga kjok dogo so kong eni, miydara lok llëm gueniyo.

§ 12:29 Deuteronomio 4.24.

³ Nopga löng kjërshko li* woyoshrozĩ, pjäy löng ba tjok eshko wleni. Nopga shdungoba löng li woyoshrozĩ, pjäy shdungoba löng ba tjok wleni.

⁴ Pjäy orkwosmok löng pjir, tjlökwo loromi ëng kong jlökoyo li bangkjrozĩa. Pjäy pë bomi lanma, bomi boy tjok eröe. Ëye pë no orkwosmono ba tjok llëm li tjok ga shdüya Sbörë.

⁵ Sbö tjläno bi kong ga

«Pjäy rayër llëm,

 pjäy kjimtër ãyado»† le.

E kjïshko ga shji dbur woydë ara llëm, pjäy wopjlú tjeng li tjok dey.

⁶ Eni ga shji tjlä ga

«Tjlapga, e bor kjimtaga.

E kjïshko ga

 llëye shärye nopgarë bor kong li,
 e bangkjrër llëme»‡ lëy eni.

⁷ Sbö tjlökwo roy lara bomi kägäyogarë bomi kong. E kjïshko ga epga woyoshrozĩa. Epga jëktong löng mär Sbö go sorë li, e woyotjlizĩ, ga pjäy omshäryos eni bakoe.

⁸ Jesucristo, e dënashko sorë ga eerishko ga eni, ga ber eni ãyado.

⁹ E kjïshko ga tjlökwo oblë lëba bomi kongshko ga jlö lëmi llëme. Shji dbo ara wlo ga woyde ga shji mär Sbö wopjlú li go, shji mär kjok llgwekklo, shji iche dli oblë oblë uë llëm li go llëme. Era llëno llëme.

¹⁰ Syöshtagaga Sbö kong ba pjeyoga kjïshko parkë löng Sbö u jong li, öng zröya, sho suya Sbö kongshko ga sjëngna li ue lok ga pjlúe. Jesús, e bi kong

* **13:3** Nopga löng kjërshko le li, e **nopga löng eshko mär Jesús go kjïshko** li loklo. † **13:5** Deuteronomio 31.6. ‡ **13:6** Salmo 118.6-7.

öng zröraba, sho suraba Sbö kong wleni, gueniyo e ber syöshtagaga li kong llëme.

11 Syöshtaga kësbangyo opzrëk jek shto zrek an-moyö roshkoshko ga öng zröra li srëng söya jek ba tjok, llëbo owa shäryara nopgarë li potjwlëkklo, gueniyo öng doyo beno tjeng li sökoba pjola, sukoba u llëmshko.

12 Eni wleni ga Jesús, e söraba jek kjok eshko li kjoko shwo lëkong, ga shdunaba, zröraba u llëmshko bako, nopga ie ber löng pjlo bek Sbö bokso ba srëng go wlo.

13 Eye wolono eni ga lökyo ara lëba. Woyde ga shji to jek ba shwoy, shji läywëba owa e kjishko gueniyo.

14 Kjok ëre kjing go ga shji kjok buk iyado wlo drete. Gueniyo shji löng kjok eniyo tjwe li koshe.

15 E kjishko ga shji kjimtaga ber Jesúsdë, Sbö poshrëy iyado wlo, shji mär Cristo go lëy iyado wlo bakoe. E ba kong ga öng zröroy, sho suroy, pjono dret ba poshrëkklo wleni.

16 Gueniyo llëbo pjlu shäryozï iyado, oblë kjimtozï bomi llëbo li go iyado bakoe. Shäryoroy eni li, e Sbö kong ga öng zröroy, sho suroy, pjono dret ba poshrëkklo wleni.

17 Sbö tjlokwo kjruga kägäyoga, e kolozïa. Epga iara Sbörë beno löng bomi daga, ga llono ga iche ba dboryë, llëbo shäryara kës li kjishko. Epga kolozï, ba pak li shärye lok wopjlu wlo. Eni llëm ga ba pak li ber kjang ba kong, ga era ber pjlu bomi kong llëme.

18 Pjäy syöshtos Sbö kong borwa kjishko. Miydërwa pjlu ga tjawa opshäryë löng pjlo bek Sbö bokso lërwa eni borwa pjlushko, ga tjawa drön ara, llëbo pjlu miydërwa li shäryërwa eni iyado wlo.

19 Rokër bomi kong ga pjāy syōshtos Sbō kong, tja kjimte jek bomi ĩk wop ā irōng obi wlo.

20 Bi Tjlapga Jesucristo wolonoshko ga woshrara Sbōrē irōng obi, ga ba srēng kwona li go ga tjlōkwo shāryara kjrina, ber ĩyado wlo. Öng wlēp ushko so daga kēsbang li e. Shji iaga ber lōng wlēp li e bakoe. Eni ga rokër ba kong ga

21 llēbo twe bomi kong uunkong, llēye woyde ga shāryēmi wlo li shāryēmi ga pjlú wlo. Rokër ba kong obi ga Jesucristo kjīshko ga llēye shārye woydē borwa tjok li, e shārye eni. Jesucristo, e poshrēy, iēy ber kēsbang, tjwlō ara ĩyado wlo. Ber eni.

22 Pjeyoga, kjibokwo toror bomi kong ēre, pjāy dbokjrē e go wlo, ga kjibokwo ēre tjlōkwoyo ara llēme. Eni ga rokër bomi kong ga tjlōkwo kjrozā.

23 Bi kjlara Timoteo, e dōktong kjērshko dwayo tjān. Lēr bomi kong miydēmi wlo. Tjwe irōng māling ga sōr jek bor tjok bomi ĩk.

24 «¿Yonde?» lēmi bomi kägāyoga kong. «¿Yonde?» lēmi Sbō nopga uunkong kong bakoe.

«¿Pjāy yonde?» le Italia sopga lirē bomi kong.

25 Rokër Sbō kong ga ba wopjlú li kjīshko ga pjāy kjimte ara.

**Sbö Tjłõ^{kwo}
New Testament and Shorter Old Testament in Teribe
(PM:tfr:Teribe)**

copyright © 2008 Wycliffe Bible Translators, Inc.

Language: Teribe

Translation by: Wycliffe Bible Translators, Inc.

Teribe [tfr], Panama

Copyright Information

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Teribe

© 2008, 2007, Wycliffe Bible Translators, Inc.
All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 28 Dec 2024 from source files
dated 29 Jan 2022

539cf8e3-01bf-5f34-8833-610f18367f8c